

Ämmä joka sousti

Tässä maailmassa assuu vanha ämmä. Tämä ämmä kuulustaa aivan semmoiselta ämmältä, joka uskois laittaa kaikki ruan ittele, joka korjaa hänen oman talon oikein tarkoin, joka kuuntelee raatiota joka aamu, joka hoitaa hänen lapsenlapset pyhinä, ja tärkein oon leipoa hänen omat leivät joka viikko. Semmonen ämmä joka ei osta leipää kaupasta. Mutta tämä ämmä ei ole minikä uskois.

Nähkää, tällä ämmällä ei ole taloa, hään assuu venheessä keskelä väylää. Hään kulkee Muonionväylän myötä, Kilpisjärvestä Pajahlaan. Ko hään tulee Pajahlaan, hään kääntyy ja soutaa koko väylän takasin Kilpisjärvele. Ja ko hään tulee Kilpisjärvele, hään laskee aivot ja antaa väylän viiä hänet Pajahlaan taas. Ja siihen laihin se jatkaa, vuesta toisheen.

Suinkhaan tämä ämmä laita hänen omaa ruokaa, hällä oon äijä joka laittaa ruokaa heile. Ämmä soutaa ja äijä laittaa ruokaa. Ja eikähäntämä ämmä leivo, tuossa venheessä. Se olis ollu vaikea. Kuten ymmärrät, net ei ole koskhaan tarttenheet korjata venheessä siksi net huiskavat heitten roskat väyhlään. Ja viimein, niilä ei ole lapsenlapsia eli raatiota. Seki olis ollu vaikea, sielä venheessä.

Yhtenä päivänä tapahtui jotaki kauheata. Äijä putosi venheestä! Ja ei ollu oppinu uihmaan, sitä ei ollu tarpheelista koska istuthiin venheessä! ”Voi voi!”, ämmä huusi kirisheen



ilhmaan. Sielä tuli paniikki venheessä. Äijä viihtoi käsillä ja ämmä huusi. Mutta meän ämmä ei ollu kleini hään oli soutanu Muonionväylän myötä koko hänen elämän. Niin, ämmä hengästi syvästi ja vetasi äijän kylmästä väylästä ilman hankaluutta. Ko kaikki oli rauhottunu, äijä sanoi ette ”Huja kuinka rääpy ette sie olet se joka souat ja enkä mie! Muuten sie et olis jaksanu vettää minut ylös!”. Ämmä myönsi ja kattoi hänen käsiä, suuret niinku männyn rungot. ”Piia in ette sie pitäsit oppia uihmaan...”, sanoi ämmä äijälle. ”Ei, ei... Nyt mie tiän kuinka ei piä tehdä ette ei putoa venheestä!” Ämmä myönsi taas, ja alkoi soutamaan. Sitten reisu jatkoi taas, Kilpisjärvele.

Vanha pari ei koskhaan puhunu siitä tämän päivän jälkheen, ja mitä mie tiän, net kulkevat sielä väylässä jatkuvasti, eestakasin.

Sofia Lindström

Kirjottaja lukkee meänkieltä Uumajan yniversiteetillä. Hään oon lähtösin Kierunasta ja assuu Malmössä.